

魚山剩稿

二



魚山剩稿目錄

卷二

奏疏 議 書

微臣失職當罷 朝廷官守當明懇 賜矜

全無誤大計疏

亟舉真賢自代伏懇 博稽廷論簡救時艱

疏

方寸已亂死期將至願 弘解網之仁矢祝

如天之壽疏

恭謝 天恩附陳微悃疏

師期尚緩臣病日危祈 恩早斥以免曠官
疏

戀 主心長瞻 天路隔伏祈 洞鑒苦懷
賜之帷蓋疏

施仁無告當先曠職濫叨非分懇 准控辭
以明大義併陳微悃以廣 皇恩疏

感事贅言一

感事贅言二

感事贅言三

荅熊石兒直指

荅堵牧遊總制

與史道鄰漕督

荅陳幾亭中翰

又

荅姜燕及先生座主

荅郭天門中丞

荅金子駿太史

又

上方禹修閣老

荅姜如農給諫

又

荅徐虞求司寇

荅詹確菴明府

荅友人

與沈聖符茂才

與四合十弟

荅友人

與馮漸卿徵君

上劉念臺總憲

書八卷俱亡於城破此續草及僅存者故
附是卷末

魚山剩稿卷二

嘉魚 熊開元 著

仲弟 熊升元 編

奏疏

微臣失職當罷 朝廷官守當明懇 賜矜全

無誤大計疏

皇上嘗賜臣以內閣典儀期臣等以趙普呂蒙正李
沆不欲其如李泌放過德宗只此數言直可以洞貫
金石感發神人臣雖短劣不敢與蒙正沆頡頏普所

爲實不欲觀之乃入直將一月矣李泌芳規實未追一二而欲不爲李泌又可得乎昨元旦夙典入直見皇上於廷臣且諭且怒臣不勝踧踖今初二日接到聖諭途中接的本內多雜亂卿等擇而後票更不可不自己經手經心致令中書好作弊也欽此又奉

聖諭朕以心膂肝膽託卿等卿等亦每以省批覽爲愛精神之忠猷試看錢邦芭併胡顯二本一則救殺難民必要速見施行一則救紹寧之困民亦必剴切言之併刻御榜尚慮無益乃以地方官料理何事爲

詞又是兩京投賊的套子何以感動人心朕亦安得
不勞乎此諭欽此除本章事件已經手經心一一
詳外其胡顯錢邦芑二本非臣所擬票臣可不言但
臣仰窺 聖意雖實以心膂肝膽相託而用大臣行
大政一稟 宸斷未嘗召臣等一商獨票擬責其密
察俯對衾影殊懷豕交獸畜之慙此非 陛下負臣
不欲臣盡職總繇臣負 陛下國之大計無所可否
君之盛德莫知就將臣以是懼每覲 天顏輒思披
犯比發口諫則刪而又刪捫而益捫婉靡之音不能

起 聖敬臣實負 陛下豈 陛下負臣哉他勿具
論如寧紹紳民困極而歸咎於地方官全無料理誠
是套子但今日行在地方大兵寡所求於民在正供
錢糧之外如胡顯所云者不少而欲畢力於數行以
繩彼地狹而兵多者言而不行或以取侮曷若不言
之爲愈也有髮爲義民一字之改誠安但臣目擊金
聲刻此二語散於直浙凡幾千萬紙徒以兵力不佳
后我者遂轉而讎我今 王師去敵遠甚操此二十
面紅牌將從何道達於彼中達矣復何道使民愛信

錢邦芑疏亦止云各將軍前當設紅牌一面未嘗請
御前造發今直算其高廣厚薄行數字數取辦五日
之內敝神思以求時夜於未卯以是爲精詳圖治之
要而責臣等以效法末世人精神不足已久在 聖
鑒中臣尤病必不能視 皇上之勞而不之恤尤不
忍也臣蒙破格 恩業以身許國無所避但恐在
左右一無匡救而危急之秋徒以死塞責死有輕於
鴻毛負此一席矣伏惟 慈憐罷遣臣無任戰慄齋
禱之至

隆武二年正月初三日具奏十五日奉

聖旨卿奏議是牌准免造不必引咎

亟舉真賢自代伏懇 博稽廷論簡救時艱疏

臣昨以病深乞罷兼辭憲務奉 聖旨覽卿恙未卽
痊甚切朕念還且寬調不必又辭憲務但今外警狎
至吏部侍郎郭維經准以原銜兼都察院左副都御
史卽炤南京法則選御史中有真心任事的嚴行保
甲以肅姦宄不准套辭卽日任事御營該部知道欽
此臣感激 天恩可以一意調治又聞郭維經之至
不勝忻喜臣於維經爲同年進士自乙丑分袂二十
餘年曾不得一通聞問然嘗於江南北詢諸郡縣所

見先後南臺孰爲優者莫不首舉維經以對謂其廉
且簡也 聖安皇帝肇起南服姦貪柄政人情疑貳
怨嗟莫必其命獨賴維經如得怙恃於是金陵道上
一郭一馬民心向背頓有擲果投石之殊臣嘗慨留
京諸仕宦一切徇情納賄擾害民間之事莫不毅然
行之苟有毫髮可以興利除害責之舉行則共相諉
託曰非吾職掌臣積憤多年莫能有當而維經獨能
於魑魅魍魎之場行日月風雷之政兒童走卒莫不
知名此必有大過人者然臣猶懼江右人材往往體

長於用頃晤臣同官曾櫻詢維經爲人則云學問經濟咸兼有之審若此則其人賢於臣遠甚臣嘗欲行古之道秦科道官不可輕授不可輕差謂省一差卽可除一害愛一官卽可塞一竇民命人心非是莫云救也而人情杌隉遂有無窮攘臂翹唇簸弄招呼之狀總繇臣物望輕微辭尊不得無以屬厭羣心誠得維經揚激其間必無所沮格然此臣一人之言也

皇上今日以一人之言用之他日必以一人之言舍之用而不竟與不用同伏乞 先以憲印畀之管理

然後集諸大夫國人詳加體察三人占從二人之言
皇上洞然於其始必可不疑於其終如 明旨所云
郭維經炤南京法則肅清姦宄是知之已素信而任
之俾行所學臣得人事 君視身事 君效相萬矣
隆武二年正月初九日具奏十二日奉

聖旨郭維經清執有品素所鑒孚覽卿奏具見公忠
體國惟賢知賢與卿同升朕方喜又得一賢臣之助
舉賢自代非朕本懷還望紓憂君父急濟時艱御營
該部知道